



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma : Tir Yimiyim

tiryimiyim@aolima

tir yimiyim

TAPAK 8

Netanyahu-i lenji maruba sülen  
Israel nung maneni longkak aiter

Gianni Infantino tanaben FIFA tir  
inyaktsü shimogo



VOL. XX NO. 154 (ADOK 154) DIMAPUR ROGONÜ (FRIDAY)

METSÜREMI (MARCH) 17, 2023

₹ 5.00

## Governor temi sorkar loksatsütsü makok: SC

**New Delhi, March 16, 2023 (Agencies):** India nung Governor temi assembly nung 'trust vote' ayongzüka magitsüla ta Supreme Court-i metetdaksüogo.

2022 küm Maharashtra Governor Bhagat Singh Koshyari-i trust vote ayonga agidang Uddhav Thackeray'er sorkar loksatsüsa aküm ta Constitution Bench-i ashi.

Züngsem 5 agi akümbe Bench nung Chief Justice of India DY Chandrachud dena lir aser parnoki Governor indang office-i ashiba osang atema ashishitep.

Shiv Sena party nung Eknath Shinde-i aniba telok aser Thackeray'er telok tsüngda mangatetep tulu lir ta Governor-i ashiba nung Constitution Bench-i ashishitep.

Shinde-i aniba telok ket nung lenmang ka liasü anungji Governor-i pa tashi amshia nübortemi shimteta sorkar ka loksabaji tim masü ta Chief Justice Chandrachud-i ashi.

"Iba ya asen democracy atema tebilemstü kanga tulu ka lir" ta paisa ashi.

"Terenlok atema senotsü ajanga mesüra party tangateta nungi pilaa aoba ajanga party sasep nung MLA tem tsüngda obang meputep adoktsü akok

ibaji atema Governor kati floor test ayonga agitsü kuli peria lir asü? Governor-i sorkar loksatsüsa pa indang office mamshitsüla. Assembly nung trust vote agiba ajanga nübortemi shimteta sorkar ka atsüngdoktsü" ta CJI DY Chandrachud-i aniba Constitution Bench-isa ashi.

"House nung nübo teimba loksatsüsa tensa ka majurura Governor kati trust vote agitsü asoshi temelaba magütsütsü. Trust vote ya House nung lennir ka shimtsü ateam masü, Governor indang trust vote ji House nung nübo teimba asoshi tetsükdaktsü ajurudang amshitsü temeten lir. Iba ama tensaji ajuru asü majuru?" ta Bench-isa asüngdang.

MVA sorkari floor test agiang ta Governor-i tetuyuba agütsü saka Supreme Court-i June 29, 2022 nü ibaji magizük. Tamakok angutsü ta ajiteta CM Thackeray-i menden toktsü aser June 30, 2022 nü Shiv Sena lennir Eknath Shinde-i Maharashtra CM inyaktsü tezüngzüktep agia liasü.

Züngsem pungu agi akümbe Constitution Bench nung CJI DY Chandrachud-i anir Justice MR Shah, Justice Krishna Murari, Justice Hima Kohli aser Justice PS Narasimha nung lir.

## Kohima DC-i jana meindoktsü tuyur

**Dimapur, March 16, 2023 (TYO):** Kohima nung April 5, 2023 nü G20 Summit alitsü atema Kohima Deputy Commissioner Shanavas C-i gari lenmang tezülen jana mebendentsü tetuyuba agütsüogo.

Dimapur - Kohima National

Highway aser Old Dumping Site Kohima nung jana bendenba noktanger, ta Kohima DC-i metetdaksü.

Maneni, Kohima - Kisama lenmang anasa car servicing lapoka alirtemi lenmang nung tzi meyimshidaktsütsü atema paisa tetuyuba agütsüogo.

## Assam HSLC paper temai adokba tasa atongsang apu

**Guwahati, March 16, 2023 (Agencies):** Assam nung HSLC paper temai adokba tasa atongsang puogo ta Assam Police-i Bodbarñü metetdaksü.

Iba nisung ya Pranab Dutta lir aser pa Lakhimpur nung api. Ano police-isa Kumud Rajkhowa ta ser tanga tesayur ka pua lir.

High School Leaving Certificate (HSLC) exam indang General Science (C3) subject paper leak asüba ken o dak sendakba nung police-i nisung 25 tashi pua lir.

Parnok rongnung kaketshirtem dena lir aser nisung 12 tashi tepuokdak lir aser 13 dang Juvenile Justice Act nung lateta aliba ama asüngdangyar.

CID-i iba tatalokba jungjunga

bushisüngdang südar kechiyong question papers ji WhatsApp ajanga leak asü. Ketdangsurtemisa original source metettsü atema WhatsApp ketdangpurtem dena osang agitepdar.

GPay aser Paytm amala wallet agencies pezü ajanga Rs 100 nungi Rs 3,000 tashi agi question papers yokshi aser iba atema Mumbai nung aliba headquarters nungi osang tejangja meshiogo ta Assam Police-i metetdaksü.

Board of Secondary Education, Assam (SEBA)-i ketdangsüa agiba HSLC general science tatidang indang question paper Deobar aonung leak asü. Iba jagi SEBA-i tatidang athi aser March 30, 2023 nü agitsü metetdaksüogo.

## 'Ali aser ki saru' arla meintok tashi ULB election magidaktsütsü: Yim Asem Lika

**Mokokchung, March 16, 2023 (TYO):** Land Owners' Board (Ungma, Mokokchung aser Khensa) pur lokti senden ka March 16, 2023 nü mena Nagaland Municipal Act 2001 nung "ali aser ki saru" meintok tashi yim asem lika nung Urban Local Bodies (ULBs) election magidaktsütsü ta lemtetogo

"Ao kin yimkong lika temeten asen tetsütebou aser tsürabur mapang pei senti zü agi alangzüka yutsüba, tanü linük temzüng Article 371 (A) ajanga Naga kin ajunga wazüka kumzüka yutsüa lir" ta Land Owners' Board Mendenbuba Imkum Pongen Tatar aser Tezüür Imlikumzük nati sangdong ka ajanga metetdaksü.

"Iba temetenji kumita ayutsü mechi Yim Asem - Ungma, Mokokchung aser Khensa Lika Board-i koba Nagaland Municipal Act 2001 nung Land and Building Tax dak sentakba osettem lir, itemji state Govt. ajanga khenyongi ozüng süa meshimeshia meintok tashi, Yim Asem Lika nung Urban Local Bodies (ULBs) election magidaktsütsü ta mezüng telemtetba nungi masetshi-i, tanüa akangakanga noktaka lir" ta parnoki metetdaksü.

Kohima Village Council-i ULB elections magidaktsütsü Kohima Village Council (KVC)-ia March 15, 2023 sangdong ka ajanga May 16 nü

urban local bodies (ULBs) elections magidaktsütsü osang metetdaksüogo.

Municipal Act nung sections ana meyaglushi tashi onoki ULBs election magidaktsütsü aser candidate temia nomination masütsü metetdaksür ta KVC chairman Helievi-o Solo-i sangdong nung shia lir.

Nagaland sorkari tetsür nem shilem 33 lemezükja Nagaland kübok Municipal Council 3 aser town council 36 nung ULB election agitsü osang metetdaksüogo aser KVC-ia ULB election yakta agidaktsünür, saka tamasa ali indang tax aser 33% women reservation arlatem yanglushitsüla, ta paisa ashi.

## Centre-i state 6 dang Covid wara azüoktsü metetdaksür

**New Delhi, March 16, 2023 (Agencies):** Tawa India nung Covid kanga prokshir aser talisa state 6 nung kanga puteter atema Centre sorkari wara azüoktsü atema tetuyuba agütsüogo.

Bodbarñü Union Health Secretary-i Maharashtra, Gujarat, Telangana, Tamil Nadu, Kerala aser Karnataka state tem dang testing, treating, tracking aser vaccination nung temulung agütsütsü metetdaksü.

"State kar nung dang Covid kanga puteta osang lir anungji

wara azüoktsü ateam mapa inyaktsü nungdaker" ta Centre-i shidi ka nung ashi.

Ita pezü shi lir külen anogo ka nung nisung 700 dak Covid puteta liasü aser parnok züngsema Covid agi shiranger nisung 4,623 kümogo, ta Union Health Ministry-i Brihostibarñep metetdaksü.

Centre-isa state 6 dang micro level (district and sub-districts) nung Covid tensa asadangtsü aser Covid-19 azüoktsü atema temulung agüja mapa inyaktsü

metetdaksüogo.

Health Secretary Rajesh Bhushan-ia Covid test positivity temaba akümbe agi taoba Honibarnü state aser union territory tem dang tebilemstü bena mapa inyaktsü indang shidi ka zülüogo.

India nung nisung 4,41,57,297 Covid nungi taneptsü angu aser 1.19% tashi süogo. Linük nung Covid vaccination drive kübok Covid vaccine dose 220.64 crore agütsüogo.

## Arunachal nung Army helicopter ka tsükok: 2 asü



Arunachal Pradesh kübok Bangjalep yimtsüng anasa Mandala anasa helicopter tsükokba angur.

**Itanagar, March 16, 2023 (Agencies):** Arunachal Pradesh kübok Bomdila anasa Army Aviation Cheetah helicopter ka tsükokdang army 2 asü.

March 16, 2023 anepdang 09:15 ako meta helicopter tsükok aser idangjisa Indian Army, SSB o ITBP sepaitemi bushiteptsü tenzüka liasü.

Tanü anüngdang 12:30 ako meta Mandala kübok Banglajaap yimtsüng anasa tayimtsü tsükoka aliba angu.

Iba lendong nung helicopter pilot aser co-pilot na taküm samaogo.

"Iba helicopter nung pilot aser co-pilot na asüba osang kanga sasaa metetdaksür" ta Army

PRO Lt. Col. Mahendra Rawat-i ashi.

Tasürtenji Lt. Col. VVB Reddy aser Major Jayanth A na ta jangjaogo.

Iba lendong atalokba kuli jangjatsü atema Court of Inquiry ka tetuyuba agütsüogo ta Army-i ashi.

Brihostibarñep 9:15 ako meta Assam kübok Sonitpur district nung aliba Missamari air base nungi apuso saka West Kameng district kübok Senge yimtsüng nungi meypia arudang ATC den osang magitet aküm.

"Bomdilla nungi kilometer 40 shi pilar Bangjalep yimtsüng anasa Mandala nung helicopter tsükokba angu" ta Superintendent

of Police B. Bharat Reddy-ia ashi.

October 2022 nunga Arunachal Pradesh kübok Migging yimtsüng anasa helicopter ka tsükokdang Army 5 asü.

Maneni, October 5, 2022 nunga Tawang nung Army indang Cheetah helicopter ka tsükokdang Indian Army pilot ka asü.

March 2017 aser December 2021 tsüngda nisung 31 tashi tayimtsü lendong balala nung süogo. Iba nung military helicopter 15 dena liasü aser itemji ALHs 4, Cheetahs 4, ALHs (WSI) 2, Mi-17V5 3 aser Mi-17 o Chetak kaka dena liasü ta ketdangsurtemi ashi.

### Mokokchung CHOs aser MOs nem training agütsü



**Dimapur, Metsüremi/March 16 (TYO):** NISHTHA Jhpiego ajanga Wadhvani Institute for Artificial Intelligence den lungjemer March 16, 2023 nü Office of the Chief Medical Officer, Mokokchung indang Conference Hall nung 4s aser AI-powerd app (cough for TB-HWC) amshia TB alitsü temolung melemi HWC OPTs anepalur CHOs aser MOs nem nem training agüja liasü.

District nung aliba Health and Wellness Centers tem nung screening mapa anir inyaksü atema NISHTHA Jhpiego aser Wadhvani Institute for

Artificial Intelligence nungi training agütsürtemi TB presumptive treatment, utilization of Nikshay portal aser AI powered "cough for TB-HWC" app amshitsü training agüja liasü.

TB cases jangjatetsü atema "four symptom complexes" nung "cough for TB-HWC" app ya screening tool talila ka ama asütsü, ta ashi.

Mapang ajak nung NTEP (National Tuberculosis Elimination Programme) guidelines nung aliba sülen anidaksüla aser TB alitsü

temolung melemtemi alirtem tendangi yoktsü ashi.

Temang nung timtemba yimya balala süaka "cough for TB-HWC app" ajanga TB case alitsü südi ta sayurtem nungdakba bushisüngdangtsü atema yoktsüla, ta ashi.

Iba sentong nung training agütsürtem ya Dr. Jignesh Sureshbhai Parmar, Senior Program Officer-TB, NISHTHA Jhpiego; Sameer Tikoo, Solution Manager, Wadhvani AI; Vandana Vasudev, Business Analyst aser Anmol Aggarwal, Business Analyst, Wadhvani AI nungertem liasü.

### Assam Rifles temi Tening aser Benreu nung awareness agütsü



**Dimapur, Metsüremi/March 16 (TYO):** HQ IGAR (North) kübok Assam Rifles, Jalukie Battalion ajanga March 16, 2023 nü Peren district kübok Tening aser Benreu yimtsüngtem nung shishaliok indang awareness agüja liasü.

Kija aser lokti renlokba nung shishaliok ajanga tongti

shilem agiba angatetdaksütsü nükjidong nung iba sentong ya ayongzüka liasü.

Employment aser rongsenketzüng jenjang tajungbai ajungkettsüba nung shishaliok ajanga shilem agiba nung ajemdaker parnoki nübürtem ayongzüka liasü.

Iba sentong ya Assam Rifles, Jalukie Battalion nungi

team kati agia liasü aser iba mapang parnoki

ajangshibatem lemsatsep. Parnoki shishaliok ajanga mapa aser takum nung yariba indang jembi aser kaketshir aser lanirtem dang meranga zünga pei mangdang tongtettsü ajungshia liasü.

Iba sentong nung nisung 83 arua shilem agia liasü.

### 78 Bn CRPF ajanga Little Flower Convent Hostel nem teyari agütsü



**Dimapur, Metsüremi/March 16 (TYO):** Little Flower Convent Hostel, Zubza ya nijai lapokba hostel ka lir, kong Nagaland aser anasa aliba state tem nungi makamaiter tetsür kaketshir

anenzükdaksür. Iba hostel ketdangtsür temi tajemtsü tzü agi timtemba indang khuret 78 Bn CRPF den lemsatapa liasü.

Yamaji 78 Bn CRPF, Zubza ajanga RO water purification

system (50 Ltr per hour) ka den tanks ana (500 Ltr) alia hostel nung inokja liasü. Item osetji March 15, 2023 nü Civic Action Programme ka ayongzüka hostel indang management nem amokja liasü.

### Air India cabin crew atema recruitment drive alitsü

**Dimapur, Metsüremi/March 16 (TYO):** Sub-Divisional Officer (C), Peren, Meyazungba Jamir NCS ajanga sangdong ka nung ashiba agi, Air India ajanga Air India Cabin Crew (Tetsürtem) atema recruitment drive ka April 20, 2023 nü Emporium Skills Training Institute,

Dimapur nung agütsü. Lanurtem asoshi ibai maongka tajung lir, anungji temsüa alir ajak arua shilem agütsü ayongzüker, ta pai ashi. Iba atema arishi küm 18 nungi 27 tsüngta asütsüla, Class 12 pass sür asütsüla aser tar 155 cm asütsüla.

### Kohima nung Destitute Fund agütsütsü

**Dimapur, Metsüremi/March 16 (TYO):** Angami Women Organization tir Neilhuzono Nagi-i sangdong ka nung Department of Women Resource Development indang "Assistance to Destitute Women" scheme kübok Backlog destitute fund 2019-20 lemtsütsüba indang shia liasü.

Iba teyari magi alirtem nem D-Block nung aliba AWO Ki (Angami Women Organization building) nung maongka ka agütsür, ta lai ashi.

Teyari agir ajungai bank passbook indang tapak mezüngbuba aser Aadhaar card

tem Xerox copy March 20, 2023 tashinung agütsütsüla, kechiaser iba sülen ang department nem agütsütsü aser teyari atema item kuli kaket ya nungdaker, ta ashi.

Teyari agirtemi pei Bank passbook, Aadhaar card aser Destitute card tem bener arua March 20, 21 aser 23, 2023 anogotem anüngdang 11:00 ako nungi nikongdang 3:00 ako tsüngta teyari sen meshitsü metetdaksü.

SBI aser NSCB account alir beneficiaries nem department nungi sen inoktsüogo, ta sangdong ajangasa ashi.

### Emotive Strings ajanga 'The Garage' sentong ayongzüksü



**Dimapur, Metsüremi/March 16 (TYO):** Taoba küm kanga junga shilem agitetba sülen Emotive Strings ajanga March 19, 2023 nikongdang 5:00 ako nung "The Garage" sentong Spirit of Faith Church, Dimapur nung ayongzüksü renema lir, kong art tabu balala meyokteper sayur.

Dimapur nung osangbener den Brehostibarnü jembidang producer Mele Pucho ajanga ashiba agi, Emotive Strings ya multi-faceted audio-visual

production ka lir, koba ajanga visual enactments amshia otsü ashir aser oshi medeni instrumental mesüra vocal ola amshia sensaksemer.

Naga nunger kenten-menü tsütsü sempet tajung lir saka concert mesüra show nungbo arua repranger mali, anungji tereprang langa asenoki achayangtsüla, ta pai ashi.

Iba sentong ya lanurtem kisüng atema masü saka ajak atema lir aser nisung ajak arua minute 75 show ya reprangtsü ayongzüker, ta paisa ashi.

### Assam: Question paper WhatsApp nungsen 3000 tashi agi ayok: DGP

**Dibrugarh, Metsüremi/March 16 (Agencies):** HSLC exam general science question paper temai adokba ken o nung Assam Police-i tang tashinung kaketshirtem densema nisung 25 puogo, ta DGP GP Singh-i ashi.

"Par 25 rongnung par 12 pur asemnü atema police ket nung yua lir. Tanüngba 13 ya juvenile (tanur) lir, aser Juvenile Justice Act agi melaba ama asüngdangya süogo," ta DGP Singh-i Dibrugarh nung Brehostibarnü osangbener dang ashi.

Iba ken o dak sendakba nung police temi yasüng nisung asem apu, ta Assam DGP ajanga ashi.

"CID ajanga iba ken o lenla ajaklen nungi bushisüngdang. WhatsApp messages ajanga question paper temai adokba ya layer pezü nungi pongu lir. Ozüng amshirtemi WhatsApp ketdangtsür dang original source metettsü asüngdangogo," ta DGP ajanga ashi.

"Telecom service agütsürtem den technical verification agiogo. Senotsü tsütatepba ya timba sen 1,000 nungi 3,000 tashi lir aser item ya GPay, Paytm amala wallet agency pezü nungi inyak. Mumbai nung agency indang headquarters dang senotsü tsütatepba tejangja meshiogo," ta pai ashi.

"Pua aliba nisungtem/kaketshir nungi police temi tongtipang lenpa-lenre nguteta lir. Aija jenshia senzür. Saka police temi parnok yakta angutsü," ta DGP Singh-i ashi.

Bushisüngdangtsü atema upper Assam nungi question paper talep kar CID dangi yoktsü, ta ashi.

Deobar aonung question paper temai adokba sülen Board of Secondary Education, Assam (SEBA) ajanga agiba HSLC general science exam songtema liasü.

Iba tatidang ya March 30 nü agütsü.



New Delhi, March 16, 2023: Brihostibarnü New Delhi nung budget senden agiba mapang West Bengal nungi BJP MP temi Mahatma Gandhi kürakyanglu anasa West Bengal Chief Minister, Mamata Banerjee anema longkak aيتدang tangokba noksa nung angur.

### PwDs pur Central scheme 17 atema UDID number nungdaksü

**New Delhi, Metsüremi/ March 16 (Agencies):** April 1, 2023 nungibo matamabensartem (PwDs) atema Central scheme 17 atema sorkari Unique Disability Identification (UDID) number agütsütsü mesüra enrolment number den state temi agütsüba disability certificate nungdaksü, ta ketdangsertemi metetdaksü. Iba number ji ajanga ministry of social justice kübok Department of empowerment of persons with disabilities (DEPwD) aser parnok den sendaktepa aliba associations-i agütsüba schemes ajanga kaketshirtemi tajangzük angütsü. Tan ita office memorandum ka nung item scheme 17 züngoka organizations aser institutions nung tekolakpurtem nem tetuyuba agütsüogo. DEPwD-i organizations aser institutions nung tekolakpurtem dang, "PwDs dak

sendakba maparen teladak asütsü aser paperwork khuret ajemtsü atema DEPwD den National Trust, Rehabilitation Council of India, National Institutes & Composite Regional Centres densema organizations balalai agütsüba schemes asoshi UDID nungdaksü," ta metetdaksüogo. DEPwD-isa, UDID number ji melira enrolment number ka den state sorkartemi agütsüba disability certificate nungdaksü, ta metetdaksü. 2016 küm tenzükba project ka kübok PwDs nem UDID cards agüja arudar. Central schemes 17 rongnung- matamabensar kaketshirtem atema scholarship schemes, teyari oset balala alitsü atema senotsü teyari agütsüba, national institutes nung registration aser treatment aser day care & health insurance scheme densema lir.

State 14 nung National Platform For The Rights Of The Disabled (NPRD) nungi matamabensartem temeden atema inyakertemi shidi ka ajanga DEPwD secretary Rajesh Aggarwal dang iba memorandum agientsüla aser UDID cards nung ang rangloker inyaktsüla aser iba card ya sorkar (central & states) ministries, departments, boards aser agencies-i mashishii agizüktsüla, ta takhangba agütsüogo. DEPwD annual report 2021-22 ajanga ashiba agi, 2011 küm census nung linük nung matamabensar nütsüng crore 2.68 lir aser yaküm January ita tashi nung parnok crore 1.74 nem ang disability certificates agüja lir. Matamabensar lakh 90 dak tema nem UDID cards agütsüogo aser state level nung iba card atema application lakh 5 dak tema agüja lir.

### Canada-i visa ashishia India nunger kaketshir 700 meyipa yoktsü

**Chandigarh, March 16 (Agencies):** Canadian Border Security Agency (CBSA)-i India nunger kaketshir 700 meyipa yoktsü atema parnok nem deportation notices agütsüogo. Parnoki visa atema educational institutions nem agütsüba admission offer letters ji taila liasü. Toronto nungi phone ajanga osangbener den jembidang kaketshir, Chaman Singh Batth-i, class 12 pass asüba sülen kaketshir 700 shii Brijesh Mishra indang agency Education Migration Services, Jalandhar ajanga study visa atema application agütsü; item visa ji 2018 nungi 2022 küm metetdaksü. Humber college nung

admission agütsüba densema tanga nungdak balala atema Mishra-i kaketshir shia dang nungi sen lakh 16 nungi lakh 20 tashi meshia liasü. Batth-i, Canada nung alitsü atema kaketshirtemi immigration department nem documents agütsü, ajisüaka CBSA-i visa agütsüba indang documents repringba mapang nung admission offer letters ji taila liasü ta jangja, ibayongji kaketshir ajak nem deportation notices agütsüogo, ta metetdaksü. Joko kaketshirtemi parnok nem agütsüba deportation notices anema court nung ken o benoktsüa akok, ajisüaka iba ken oji küm 3 nungi 4 tashi atsülangtsüa akok; iba dak alia Canada nunger lawyers hire asüba nung sen jenti indoktsü.



India linük tesem balala nung question paper 'leak' asüba anema Brihostibarnü New Delhi nung National Students' Union of India (NSUI) züngsemtemi longkak aitba noksa nung angur.

### March 25 nü CBI-i RJD lenir Tejashwi Yadav jaoker

**New Delhi, March 16 (Agencies):** Brihostibarnü Central Bureau of Investigation (CBI)-i Delhi High Court dang, parnoki tan ita Bihar Deputy Chief Minister, Tejashwi Yadav maputsü, ta nangzükba sülen Yadav-i March 25 nü Delhi nung aliba CBI office-i aotsü melungogo. Mapa atema ali sübokrem agiba ken o ka dak sendakba nung CBI-i March 25 nü RJD lenir, Tejashwi Yadav dang asüngdangyatsü. Tejashwi Yadav-i Delhi High court dang, CBI-i pa jaokba tetuyuba agüja alibaji agienjang, ta temepishiba ken o ka agüja liasü, ajisüaka CBI-i pa maputsü, ta court dang ashiba sülen pai CBI matsüngdangi aotsü melungtetogo. RJD tongti aser taoba mapang Bihar Chief Minister, Lalu Prasad Yadav'er jabaso, Tejashwi-i, tang tagidak Bihar state assembly senden ya April 5 nü tembangtsü, anungji pa nem ano mapang tatsüka agüjang, ta bushisüngdangba officer dang aiben mepishia liasü. Tejashwi Yadav indang lawyer-i ashiba agi, taküm February ita nungi tenzükba tang tashi nung CBI-i Yadav

asemben tashi jaoka liasü. Tejashwi Yadav-i, "CBI Delhi office ajanga kasa ken o nung asüngdangyatsü atema nisung ka jaok saka puogo. Parnoki ni-a aputsüa akok. Ni Delhi tonga odaktsütsü aser aputsü, ibaji parnok nükjidong lir," ta ashi. Iba dak sendakba nung CBI atema jembitsür, D P Singh-i, Honibar anogotem nungbo assembly senden mamener, anungji Tejashwi Yadav-i tan ita Honibar anogo ka nung CBI matsüngdangi arutsü akok, ta metetdakja liasü. CBI lawyer-isa court dang, Tejashwi Yadav tan ita nungbosa maputsü, ta ashi. 2004 nungi 2009 tashi Lalu Prasad Yadav railway minister inyakba mapang nung railways nung mapa balala nung shimoktsü atema par kibongi ali kiojen sübokrem agi mesüra alizük, ta tai tonglokja lir. CBI-i, Indian Railways recruitment inyakyim alema tim mesüi railways mapa nung nisung aika shimok, ta tai tonglokja lir. Kasa ken o dak sendakba nung March 15 nü trial court kati Lalu Prasad Yadav, pa kinüngtsü aser taoba mapang Bihar chief minister, Rabri Devi aser jala Misa Bharti nunger nem bail agütsüogo.

### Farooq leniba nung J&K nungi lenirtemi Election Commission ajuru

**New Delhi, March 16 (Agencies):** Brihostibarnü National Conference Tir, Dr Farooq Abdullah leniba nung Jammu & Kashmir nung party ajak nungi lenirtemi telok kati Election Commission of India (ECI) ajurura tekaraba nung J&K nung assembly election ayongzükba agütsü mepishiogo. Jammu & Kashmir nung assembly elections tesüsabuba agibaji 2014 küm liasü. J&K nungi lenirtemi New Delhi nung ECI ajurua temepishiba shidi ka agütsü.

Parnoki ECI dang, J&K nung assembly election menoba mesüra ayongzükba magiba ya Jammu & Kashmir nung alirtemi nem democratic temeden magütsüba den kasa, ta ashi. Brihostibarnep national opposition party tem nungi lenirtemi aser J&K nung opposition party nungi lenirtemi Delhi nung aliba Constitutional Club nung senden ka mena Jammu & Kashmir tensa atema jembio. Taoba mapang J&K nung

Chief Minister, Farooq Abdullah, General Secretary CPI(M) Sitaram Yechuri, NCP lenir Sharad Pawar, Congress, CPI aser RJD nungi lenirtemi iba senden nungji aden. Senden tembangba sülen Farooq Abdullah leniba nung J&K nungi lenirtemi ECI ajurua temepishiba shidiji agütsü. 2018 küm November ita nung J&K Angh, Satya Pal Malik-i Jammu & Kashmir legislative assembly anentsüba sülen nungi J&K nung nüburtemi shimba sorkar mali.



March 16, 2023 nü Thane district, Maharashtra nung aluyimertemi Nashik nungi Vidhan Sabha (Mumbai) tashi longkak aita jajadang tangokba noksa nung angur.



## TIR YIMYIM YIMOBILEM (EDITORIAL)

DIMAPUR ROGONÜ, METSÜREMI (MARCH) 17, 2022

### Nübortem ya kiburtem

**A**merica tir asembuba Thomas Jefferson-i ashi ama, "asenok nübortemi shimtetba government-ji asen dak alang government asütsü." Iba o ya asenoki angatetra, tanü asenoki government nung alirtem majung jembiba ya zep ta anentsü aser asenoki asenok taküm yimya aser jakla meyipa reprangshi tenzüksü. Aji oda, asenok nübortemi government nung alirtem indang majung jembiba ya parnok majung masü asenok majungba indang jembir ta asenoki angatetsü. Akhi putu nung ama chuba kati yimsü asür asünungbo yimsüsüba tashiji chuba dak keta lila saka tanü putu democratic yimsüsübare nungbo yimsüsütsü tashi ya yimsüsür dak masü nübortem dak keta lir. Anungji, nübortem tashi meitra yimsüsürtema tashimaittsü aser nübortemi ochimeshira yimsüsürtemia ochimashitsü. Iba jagi nübortem dak nungi tashi agizüka yimsü asüba democratic yimten nungbo yimsüsürtem dang nungibo nübortem tekümdangba aser saksalem tasüba alir. Iba amaji ka nübortemi pei yimten khuret bena yimsüsürtem menungitra, yimsüsürtemi nübortem amadoktsü aser pei inyaknüsü inyaktsü. Aji oda, chuba yimli (monarchy) yimten nungbo kiburji chuba aser nübortemji par kilirtem saka nübortem tashi ajanga yimsüsüba (democratic) yimten nungbo nübortemang kibur aser yimsüsürtemjiang kilir, iba jagi parnok dang ministers ta ajar, ministers tetezü kilir aser tenzükertem. Iba tetezü angateta kodang asenoki asen lima meima yimten khuret bendir, tanü asen lima sensakba aser tejakleni onüseta moutet timatempa ya yimsüsürtem majungba agi masü saka asenok nübortem majungba agi merenloktetter ta angatetsü. Election nung asenok nübortemi election nung toktepertem indang rongsen menakrepa chitsüba apibo, election nung adoker yimsüsürtemang asenok madak kibur kümer, asenok par kilir masü alar kümdaktsütsüa langa lir. Ajisüaka, iba otsüji yutsür, yaküm küm tashi nung asenoki government sentong tapu balala tenüng nung yimsüsürtem dang nungi mapa aser senotsü meshia inyakba mapatem indang bilemdangra, asenok ya Khristan asütsübabo talangka nung yutsür nisunga memesük taaktsü maketba shiruru telokang ka mesüka kümogo. Aji oda, asenoki sen meyirijang ishika jenjang mapaa ochishia meinyaktetter, ajak tiyazü nung sen agizüka agiba purtem dang lir. Kiburi yamaji mapa ajak nung ochimashi aser meindang inyaka alinung, kodaser kilirtemi mezüngmeshi masütsü? Itemji temulung nung yur, taküm küm nungi danga, election nung asenok vote ayokba aser tashiyim amshiba tai temenentem to Tsüngrem dang nangzüker, asen lima tarutsü lanu putu asoshi yanglushi tenzüksü imlar. Aji oda, asenok asoshibo government ta asübaji chuba masü saka nübortem, anungji asenok melen jembitsü aser inyaktsü shimer yokba yimsüsürtem jagi asenok nübortem (kiburtem) akhümtsüba tenzüksüsa asenokji kanga azüoka, kümdanga aser mita alitsüla. Asenoki asen government kübok department shia nung nübortem asoshi inyaktsü renema aliba sentongtem aser senotsü jenjang metettsü tim. Aji oda, nübortem asoshi yangluba lenmang aser kiojen indang drawing dena meshia mapa shitak inyakdaktsüsbaji nübortem dak tashi lir. Atangji, tatar senden nungbo nübortemi shimer yokba tatar dang shilem agitsü saka government maparen ajak nung nübortemi tebang ia shilem agitettsü, kechiyong mapaji nübortem asoshi inyaker, tetezü nübortemji mapa madak kibur. Aji oda, nübortemi government nung alirtem nem terenlok mapa inyaka aotsü atema shisa tasen agüja yariteptsüla aser terenlok mapa ajak, tulu tila ta masü, pei atema inyaktsür asünungji, kibur-a ta bilema mapa ajak nung ochi mulung agi temulung agüja inyaktsüla. Tanga state nungbo nübortem asoshi lemsatetsüba sen teraka danga ochimashi amshira, idangjisa nübortemi office kima mesüra lenmang lendi mokdanga yur, ochimashirtemji mapu tashi aser mapaji shitak küma meinyak tashi longkak aita amonger. Pi lima nungbo nübortem dak aliba tashiji yamaji ola adoka amshitetter. Idakji par yimer, ozü yimer ta mali mesüra par party, ozü party ta mali, ajakji tenzükertem kiburtem mezüngmeshiba anema ola adoker aser nübortemi nübortem asoshi inyaker. Tang nungibo asenokia iba tashiji amshia asen lima tajungba küma yangluba nung ola adoka shilem agitsü imlar.

## OLEMSABANG

### KODA ASÜTSÜ SUNDAY SCHOOL SHIBANGER

~ P. Renthly Jamir

(Yashi adok nungi...)

Alima rangbenji tokja lir India Nagalima nung khen India Environment Think Tank 01-06-2019 nung ashiba agi life expectancy in India gone down by 2.6 years due to the deadly disease caused by Air pollution. Tzü mopung menenba agi arishi küm 2.6 years ajemer tatsüba akümer aji asenoki meteta atalokdagi. Iba den miim mozular yilar temesen rungdoker tezüngjang raksar, asürtem züngermezüngmar. Ano Euthanasia ozüng koba agi timtemer tesünürtem peisasa asütsü temelaba ozung sayaja Supreme Court land mark Ruling Recognised "Right to die" ta five judges headed by Justice Dipak Misra-i melaogo. Kanga timtema shiranger ajak peisasa sünura asütsübajia alima nübusa aremer. Iba den nisung tamajunger ashih auer miim mozü ayoker züngermezüngma tamakitsü kümer jail kitem ajak mesemi putena lir. India nung jail tuluba Tihar jail nung capacity 2500 ayutsüba nung nisung 9000 puoka lir ta ashir. Nagalima tilaba Nagaland for Christ nunga jail capacity 1450 ayutsüba nung 2069 lir ta ashir, ajia nübusa aremer. Aji dang masü tanü asen Nagalima nung cancer tashitak ya yimra agi shirangba ama ka küma taküm jenti samaba angur. Nagaland Medical Directorate-i sangtongba agi küm shia government Servant cancer agi shirangba nung sen Crore 22 endoker aser mapa nung sotaka malir publictem dak sen Crore 60 endoker ta ashir. Süra itemji kwi mekümsükteti sür alitsü. Cancer ta dang ashir ano tashitak tamajung kwi agi nisungtem sümar. Yamaji nübu temeki küm 10 yongsük nung terenlokba kata mali nisung 9436 agi ajem süra government birth control, birth control ta pi alima nütsüng teimba lima nunga tanur asem tashi asotsü temelaba ozüng yanglur süra Nagalima nung tanur ana dang asotsü ozüng yabo melenshitsüla ta bilemer. Medical departmenti tetsür ka tanur ana asotsü dang maternity leave melar. Yabo melenshitsüla ta bilemer. Yim tazüng tanur kata senzüa mangur.

Naga nübura asoshi teyanglur Tsüngremi ashir nenok madak anüngi pei azüngtsü sota lir alimai pei tejang sota lir Hagai 1:10. Tang India nung school nung tesayur shia tanur 32 atar aser Nagaland nung tesayur shia tanur 7 atar. School teimba nung tanur kata Malia lir. Tatsüba agi school nung dang masü yimtsüng mepu, mepu, aser town ward, ward aika nung tanur mali SUNDAY SCHOOL shibang yonga aoba angudang aiatai ya Koda asütsü ta shisadanger. Onok ward nunga tanur ana dang aliba agi takum nungi Sunday School shibangogo. Ashiba ama alima tzü mopung menenba agi anojungi tanutsür tanupur aika asur aser linük nung nübu mali akümer. Ka alirbo ana alirbo masütsü ta makaji Amos 8:10 nung ashiba ama item Tsürabur Jabaso ka dang aliba sür mang ayimba taku Tia nung aika angur aser sasasetta bilemetsür.

Alemlibo tetsür ka tebur ka asungteta alir dang sati kuli agütsü. Ki ayimbaji meraketa liasü. Tanübo küm ana asem Lia tanur asem pezü soa endokerang satir. Anungji Hosea 4:10 nung ashiba ama kibong kumer tapung kibong makumdang Tar toktemer alir aikasa lir. China Beijing nungbo yamaji melidaktsür unmarried couples living together fine 120 dollar Sin Tax. Nagalima nung ki ayimba agi asaya menü kümdakja Dimapur nung 05-11-019 satir Ak-47 amer couples with arms ta governorbai DGP dang case register süang ta ashiba asenoki nguogo. Lai nung satibaji Ak-47 nung masü saka ajak rongnung tetushiba nung yuang ta lbri 13:4 nung angur. Item shia Aruba kuli ajak yagi tatalokbaji tanur masor tesa tasor karjagi government ozüng ama ana sor shibanga ayur.

Tanur maso nungji aser tasür onsara asünungji nübu mali küm 10 census-i sayur. School teimba tanur kata mali oda Sunday School tashi shibang yonga aoba angudang tanur asotsü ajungshiteptsüla ta temulung ayanga bilemba shisa lemsatempa Government of Nagaland (two child maternity leave) policy melenshitsüla aser kiyimsang aser kiyimlakibong ajaki. Tsüngremi tanur kwi moatsü paikaji asotsü tazünger ayongzüker.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Pastor tem shilem 52-i dangpei mapa agi melung asür: Barna Group

**March 16, 2023:** Pastor tem shilem 52-i dangpei mapa agi melung kanga asür, ta Barna Group indang survey ka ajanga bushitet.

Pei wadang nung melung asüba pastor tem shilem ya tesüiba küm aika tsüngda kanga ajema kümdar, kechiyong 2015 küm nungbo pastor tem shilem 72-i pei wadang agi melung kanga asüba lemsatepa liasü, ta Barna Group-i metetdaksü.

"Tanela nung lulaadokba mesüra azümgmeyaka bilemba mesüra temang majungba pastor tem teimba dang akümer. Iba dak alia pastor tem rongnung pei wadang agi melung asüba shilem kanga ajema kümogo. Pei tajaba wadang nung melung lemtetba pastor tem ajema akümer," ta Barna Group-isa metetdaksü.

2022 küm pastor tem shilem 35-i dang parnok Tsüngrem tenzüka wadang nung ajemokba sülen tenzüka wadang nung pei tajaba tang tejangjaba kümogo aser melung alemer, ta ashi.

2015 küm pastor tem

shilem 53-i tang parnok inyakba Arogo nung pei wadang inyakba agi melung kanga asür ta lemsatepa liasü saka tangbo yamaji ashir pastor tem shilem 38 dang kümogo.

Coronavirus wara ajanga lenla aika kongshia liasü-Tenla kidang adenshia tekülem sentong magitet, tamangertemi tenla agütsüba ajema aküm, Arogo rongsenketzüng jenjang mejungi aküm aser wara dak sendakba onük balala nung mangatetep adoka liasü. Tang wara süiadokogo saka tang tashi pastor tem, talisa tanobur pastor tem melung ajema kümogo, ta Barna Group-i metetdaksü.

Tatishitsü agi, arrshi küm 45 ser tekübokpur pastor tem rongnung shilem 35-i dangpei wadang agi melung kanga asür, ajisüaka shilem 66-ibo pei tajaba wadang nung ratamataba mapang ka ajangshia liasü, ta lemsatep.

Pastor tem pei wadang agi melung asüba shilem ya talisa 2020 küm nungi kanga ajema

akümer. 2020 küm pastor tem shilem 67-i pei wadang agi kanga melung asür ta lemsatepa liasü saka 2022 küm tashi nungbo yamaji ashir pastor tem shilem 52 dang kümogo.

2020 küm pastor tem shilem 47-i tang parnok inyakba Arogo nung pei wadang agi kanga melung asür ta lemsatepa liasü saka 2022 nungbo shilem 38 dang kümogo.

Barna Group CEO, David Kinnaman-i sangdong ka ajanga, "Tesüiba küm asem tsüngda pastor tem ya frontline workers liasü. Kanga ani-belemba, azümgmeyakba aser telemsa adokba ajanga pastor tem kanga mejungi kongshio," ta metetdaksü.

"Tenzükba wadang nung melung asüba shilem kanga ajema akümba ajanga tarutsü nung Arogotemi timtem tulu ajangshitsüa akok. Iba tebilemtsü onük atema mera agia inyaksü aser pastor tem nungita yaritsü nüngdaker, ta iba research ajanga sayur," ta paisa metetdaksü.

## Alima nung Khristantem teimba tepsetba linükji Nigeria lir

**March 16, 2023:** Alima nung Khristantem teimba tepsetba linükji Afghanistan mesüra North Korea masü saka Nigeria lir; yaküm alima nung Khristan 5,621 tepset aser shilem 90 bo Nigeria nung tepsetba liasü, ta osang ka ajanga metetdaksü.

Mission organization balalai, alima nung Khristantem tamajungtiba reshikangshibaji tesüiba küm 30 tsüngda liasü aser ibaji talisa northern Nigeria nung tesüiba küm 24 tashi Khristantem kanga mejungi reshikangshibaji agi lir.

Nigeria nung nütüshillem 50 shibo Khristan nütüshillem lir, aser parnok teimbaka southern Nigeria tsütsü lir. Tanungba nütüshillem 50 ji Muslim nung lir, aser parnok teimbaka north tsütsü alir.

Northern Nigeria nung Boko Haram densema Islamic kiralongrar telok aika lir aser tesüiba küm 10 tsüngda parnoki tetsür meyrjang aika puer aoba den külemi nisung meyrjang aika tepsetogo.

1999 nungi 2001 küm tsüngda state 12 nung Sharia ozüng tanaben benokba sülen mapang tatsüka dang lirbo 2002 küm Boko Haram telok ya tenteta liasü. Nigeria linük temzüng ajangabo senso ajak nem yimsü dak sendakba temeden agütsür, ajisüaka northern Nigeria kübok state aika nung Sharia ozüng tanaben benok aser iba mapang nungjagi tenzüka northern Nigeria nung Khristan 50,000 shi tepsetogo.

Nigeria nung Khristantem atema tensa tamajungba dang akümer. Nigeria nung yaküm

Khristan teimtiba tepseta liasü (5,000 dak tema tepset).

Yaküm Nigeria nung Khristan 5,000 dak tema tepset aser parnok rongnung Deborah Samuel densema liasü. La ya northern Nigeria kübok Sokoto state nung aliba university ka nung tezüngdak liasü. Lai takok anguba atema Yisu tenüng asangba agi Muslim nungeri la tepseta liasü. Yaküm May 12 nü Muslim nungertemi Deborah long agi onsetsü.

Deborah Emmanuel Yakubu ya Sokoto state yimtiba, Sokoto nung aliba Shehu Shagari College of Education nung tezüngdak liasü. La dak azükba sülen long agi onset aser tasümanngi rongdok.

Deborah ya lar jila Tungan Magajiya nung aliba Evangelical Church Winning All (ECWA) nung züngsem ka liasü.

## ANOGO ABEN TSÜNGREM DEN

### Tsüngremer Tereprangtetba

T.Ken 73: 13 - 17.

Bendanga agütsüba Khristan taküm kaji shidakba tetemjen taküm asü? Tashi mangartem azükarua alidang Kibuba dang tashi anga alitsüji tim asü? Asaph süngmangdaktsübaji ibaji liasü.

Tekong 1 - 12 tashi nung atangji pai taküm tajungji züdoka liasü ta pai iba ken nung zülu." Atangji amajok nung kü mulungjang merüktet, aser tai makaba nung kü teka shidik; kechiyong anogo tepiyong ni kangshir, aser anepdang shia ni merenshir. Ni yamaji jembidir ta ashi asübo; ajiang, ne chirnur putu den ni külaka inyaka lila" (t. 13 - 15).Item ajak ya koda tembang? "Ya koda angatettsü ta ni bilemdangdang; ni Tsüngrem külemdaki orr, parnok tesü tia mebilemdang tashi, ni atema ya onsara timtemtsü ka liasü" (t. 16,17). Asaphi ajibaji tai liasü, aser iba jagi pai Tsüngrem mebushi tashi taküm indang asüngdanga liasü.

Nai tenem ka talang nungi reprangra, nai langka angutsü. Saka tenem kasaji anasai orr reprangra balaka angutsü. Nai ajiba jagi noksaji melenshir masü, saka ne dak koda kongshir. Anungji asenoki Tsüngrem külemdaki aotsüla. Pa indang Pa külemdak nai kechi angazüker aji tongtipang lir.

Nai ne mulungjang amajok nung merüktetter asü? Atangji, masü. Ajaki temulungjang temerük aginer. Nai ne teka tai mali ta metsükdoker asü? Ajaki teka temerük aginer. Mejembitsü o ne meli agi jembir asü? Tekong 15 nung metsübuttsü indang ashir. Nai koda bilemer shidakbaji Tsüngrem dang shiang. Na ratamata lir asü? Süra na Tsüngrem külemdaki aotsü tenüngdaktsü. Tsüngrem den mapang ajiang. Pa o nungi ne tebilemba angatettsü.

Tsüngremi angatetba tsütsü nungi ne mangdang meyipa reprangdang. Nai ajibaji kota ajiba südakjang. Iba jagi na ajujiba nuni kümzüksü, aser nai Tsüngrem den takokba nung jajatsü.

Nüngdak mapa nung ne tebilemba nungi tepila tulu adoktsü akok. Tsüngremi asenok nem Pai ajiba ama ajidaktsüner. Tsüngrem indang shisadang aser aji inyaksü asoshi Tsüngrem külemdaki oang. Tsüngrem o agi ne kolok aser ne mulungjang sünga lidakjang. Ne khuret Pa nem bendanga agüjang.

## Sorkari kasa kiyimba anemba atema Arogoi tenüngsang agütsür

**March 16, 2023:** Tawa kasa o kasa kiyimba pu-Centre sorkari India nung masemer mesüra tetsür o tetsür na mesüra tebur majungkettsür. Kiyimbaji tebur o tebur na kiyimba anema ka aser tetsür ka na tsüngda Supreme Court nem affidavit dang lir aser tepela aliba kibong ajang telangzüba agütsüba ka asütsü atema lir," ta pai ashi. atema Arogoi sorkari nem India nung kasa kiyimba ya tenüngsang agütsüogo.

March 13, 2023 nü osangbener den jembidang Catholic Bishops' Conference of India's Office for Doctrine nung züngsem aser Mangalore nung tongti putir, Peter Paul Saldanha-i, "India sorkari inyakbaji tenüngsang agütsütsü tetemsü aser onokia pelaa agizüker," ta metetdaksü.

Tetsür o tetsür na mesüra tebur o tebur na kiyimba ya tim masü, ta Arogoi züngshir aser magizükteter, kechiyong Tsüngremi asenok dang kibong kaji tebu ka, tetsü ka aser tanurtem asütsü sayur, ta Peter Paul Saldanha-isa metetdaksü.

"India nung Catholic Arogoi

metetdaksüogo.



March 12, 2023 nü Los Angeles nung Khristan artist, Charlie Mackesy-i "The Boy, the Mole, the Fox and the Horse" film ajanga Oscar award agizükdang tangokba noksa nung angur.

**AO OSHI ANGAZÜKDAK:**

**TANÜ ANGAZÜKTSÜBA OJANG**



Tir Yimyim

**Pentok**

(n) kum ana tashi aluyimer mayim toktsüba (abandoned field after 2nd year of jhumming)

\* Pentok nung aansotsü aika meyteta liasü.

**Pentong**

(n) alu mayim toktsüba tesem (abandoned farmland)

\* Pentong nung mongmong aika yatateter.

**OLONG PAITEP # 6458**

15x15 crossword grid with numbers 1-16 indicating starting positions for words.

**TIPLÉN**

- 1. O jembitsü tashi - 8
5. Súngjang tapu ka - 5
7. Tekanük nung enokba - 5
8. Teka amtep - 5
12. Tzüc asendak - 5
14. Tsünpang tema aliba - 5
15. Ken atenba yimya - 5
16. Asangur - 8

**LANGTSÜNGLEN**

- 1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

**OLONG PAITEP # 6457 TELANGZÜBA**



**TIPLÉN :**

- 1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer, 13. Sen,
15. Kiochtsü, 17. Itsük, 18. Kar.

**LANGTSÜNGLEN :**

- 1. Tai, 2. Asensor, 3. Tanü, 4. Kua,
5. Mitsütsü, 6. Azübenshi, 8. Lah,
9. Jangkok, 12. Akok, 14. Nashi, 16. Sür.

**Agüja aliba noksa nung meputepi aliba bushiang**



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesura 4 jelja e-mail : tiryimim@gmail.com nung yokang mesura Tir Yimyim bureau tem nung agüjang.

**Tepela Tasoba Anogo**



Form with fields for: 1. Tenüng, 2. Tasoba anogo, 3. Küm, 4. Class, 5. School, 6. Talidak, 7. Salem osang

**Tripura Assembly nung MLA 42-i tezüngzüktep agiogo**

Agartala, March 16, 2023

(Agencies): Tripura nung BJP, IPFT aser Congress züngsemtemi Assembly office nung tezüngzüktep agi saka CPIM MLA temibo Pro-tem speaker indang chamber nung dang tezüngzüktep agi.

Pro-tem Speaker Binoy Bhushan Das-i MLA tem tezüngzüktep agidaksü.

March 16, 2023 nü MLA 42-i tezüngzüktep agiogo aser parnokji BJP MLA 31, IPFT MLA 1, Congress MLA 2 aser CPIM MLA 11 lir.

"Yashi ni Governor tsüingdang

tezüngzüktep agiba sülen tanü BJP MLA 31-i kü tsüingdang tezüngzüktep agiogo. Ano BJP MLA Pratima Bhoumik-i la sodi agiba shidi agütsü. Congress MLA 2 aser CPIM MLA 11-i kü chamber nung tezüngzüktep agi" ta Pro-tem speaker Binay Bhusan Das-i ashi.

Tipra Motha MLA ajaki March 17 nü tezüngzüktep agitsü osang sangoktsüogo, ta pai ashi.

"Onoki state aser linük ajungalen renloktsü atema tezüngzüktep agiogo. Onoki tensa süngjema ayutsü atema

inyaktsü. Onoki tesempatep adoktsüsa olen mejembitsü, lisapur aser lisapur masürtem tsüingda tesentaktep raksatsüsa mejembitsü. Ruling party aser opposition lir aser onoki assembly nung tebilemba tajung agi külemi inyaktsü" ta Chief Minister Dr Manik Saha-i osangbener dang ashi.

"Tripura sorkari terenlok dak alaka tanga tebilemba kecha mali. Prime Minister Narendra Modi-ia 'Unnato Tripura' ta shiogo anungji onok indang tongti alizüngji terenlok lir" ta Dr Saha-isa ashi.

**Assam nung Class IX kaketshir nem bicycles angati agütsütsü**

Guwahati, March 16, 2023

(Agencies): Finance Minister Ajanta Neog-i Assam Budget 2023-24 benokba nung kaketshirtem nem teyari balala agütsütsü indang shia lir.

Pragyan Bharati kübok class IX kaketshirtem nem bicycles angati agütsütsü, textbooks angati agütsütsü, textbook teyari agütsütsü aser higher secondary examination

nung takok tajung angur nem scooty agütsütsü ta Finance Minister Neog-i ashi.

Post-graduate students nem küm nung Rs 10,000 mobility grant agütsütsü, BPL kaketshirtem dang admission fee magitsü, HSLC kaketshir nem Anundoram Barooah Award agütsütsü aser SC, ST, minority & tea-garden communities nungi kaketshir

nem scholarship agütsütsü ta Assam Budget 2023-24 nungsa shia lir.

"Assam nung college 8 tashi university akümsü aser nüjiso atema rarar Shahid Kanaklata Barua nüngtem nung state university tasen ka tenzüksü aser Udalguri nung Bodoland University indang satellite campus ka lapoktsü" ta Finance Minister-isa ashi.

**Manipur nung telungpur ana apu; demand letters 3 apu**

Imphal, March 16, 2023

(Agencies): Manipur police indang commandos-i telungpur ana tesem balala nung apu aser tena ket nung demand letters 3 dena taittsü kulikakettem aika bena liasü.

Lilong nung telungpur kari tashiyim agi sen sarur ta osang tejangja ka angazükba sülen Imphal West District police nungi special commando team

kati telungpurtem mita ao, ta osang ajanga ashi.

Iba mapang Ibok Lainingthou, Chajing Lilong tekülem ki anasa RK Bobo (30) ta ser telungpur ka apu. Pa ya Narankonjin nunger lir.

Pa dang asüngdangya asüba sülen commandos-i Imphal East district kübok Thangapat Moat tesem nung mita ao.

Idangji Elangbam Biken (24) ta ser ano telungpur ka apu aser pa ya Wangkhei Thangapat nungi lir.

Tena ket nungi mobile phone 2 aser demand letters 3 dena taittsü aketba kulikakettem ngutetogo.

Iba maparen ya Superintendent of Police, Imphal West district lenisüba kübok inyak.



Assam kübok Karbi Anglong district nung AK series rifle aser pistols dena prangpong-injang aika rema aliba anguba sülen agiba noksa angur. Osang tejangja ka angazükba sülen Dokmoka Police Station kübok Doidak nung police telok kati bushitepa aodang AK-56 rifle ka, 9mm pistol ka, .32 calibre pistol ka, sten gun ka aser injangtem angu ta Karbi Anglong Superintendent of Police Sanjib Kumar Saikia-i metetdaksü.

**GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA**

NO.DET/ESTT-2/5/2016-17 Dated, Kohima the 16th March 2023.

**NOTIFICATION**

The North Eastern Regional Institute of science & Technology (NERIST) Nirjuli, Itanagar, Arunachal Pradesh for Certificate had came out with advertisement for admission to Certificate Module Courses and Degree Module Courses in Technology streams and also in Forestry for the session 2023-2024.

Interested candidate may apply though online w.e.f.17-02-23 to 25-04-2023. Through the Institute website www.neeonline.ac.in or www.nerist.ac.in.

(ER.VIPULHOU LHOUNGU) Addl. Director & HOD.

# Cyclone Freddy ajanga Malawi, Mozambique nung asür 300 alemogo

**Maputo, Metsüremi/March 16 (Agencies):** Tropical Cyclone Freddy ajanga nisung asüba 300 alemogo aser asür maneni lir, aser Mozambique aser Malawi ketdangsür temi takoksa aser asüamaba asadangtsü anogo aika agir.

Iba yipru yagi hopta tatemlen South Africa ajanga ao, koba February ita tatemlen mezüing süyiba sülen tanaben buba liasü. Iba yipru ya yipru talangtoba kumogo aser Africa nung tesashitiba rongnung ka alitsü.

Mozambique indang Zambezia province nung nisung 53 süogo ta ketdangsür temi Bodhbar aonung ashi, koba taoba mapang dang anasü agi timba lir.

Malawi nung tang tashinung nisung 225 asüba osang lir, noklang aika yiru aser kar samar lir. Iba yipru yagi Madagascar aser Mozambique nung nisung 27 shi takum samatsür ano Mozambique nung tanaben kongshir.

Tzünglu tanen makai aruba aser power maliba ajanga tan hopta timtem nung alir bushia kumzükba maparen nung tetsükdaksü ajuru, kechiaser yipru ya ajanga tzümetsüing tesashi adokdaksü, lenmang aser alu nungzükero ao, nisung temang aser ki molushi nung arem.

Malawi Tir Lazarus Chakwera-i asürtem asoshi anogo 14 mangyimtsü

ayongzük aser sorkari sen million \$1.5 teyari agütsütsü nangzük, ajisüaka kibong 20,000 dak tema tesem balala nung prokshia lir.

Nisung noklang aika samar bushir aser rescue service peria maliba ajanga nüburtem ain adoker, ta Malawi indang commercial hub Blantyre nungi osangbener kati ashi.

Nüburtem ketdangsür nungi teyari atadang parnok sasa telok lemsar nisung tasü mang bushiteper.

"Rescue team mali, police officer mali, sorkar ketdangsür shinga mali. Kasa nisung dang lir," ta David Phiri-i ashi, shiba kinunger nisung pezü samar aliba bushia liasü.

[See Regulation-15 (1)(a)] / 16(3)

## DEBTS RECOVERY TRIBUNAL GUWAHATI

Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahti- 781007 (Assam)

Case No.: OA/435/2022

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.

Exh. No.: 2787

CANARA BANK  
VS  
MR SUMEET GOEL



To,  
(1) MR SUMEET GOEL  
D/W/S/O- Son of Ravinder Goel  
Son of Ravinder Goel C O Total Solution Mid Land PWD ,Road Dimapur 797112 Nagaland Dimapur,NAGALAND -797112

(2) MR RAVINDER GOEL

S O SRI RAM KISHAN GOEL DR TEMSU BUILDING 2ND FLOOR NCT COLONY DIMAPUR 797112 NAGALAND DIMAPUR,NAGALAND -797112

### SUMMONS

WHEREAS, OA/435/2022 was listed before Hon'ble Presiding Officer/Registrar on **30/01/2023**.

WHEREAS this Hon'ble Tribunal is pleased to issue summons/ notice on the said Application under section 19(4) of the Act, (OA) filed against you for recovery of debts of Rs. **2556879.59/-** (application along with copies of documents etc. annexed).

In accordance with sub-section (4) of section 19 of the Act, you, the defendants are directed as under:-

(i) to show cause within thirty days of the service of summons as to why relief prayed for should not be granted;

(ii) to disclose particulars of properties or assets other than properties and assets specified by the applicant under serial number 3A of the original application;

(iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;

(iv) you shall not transfer by way of sale, lease or otherwise, except in the ordinary course of his business any of the assets over which security interest is created and/ or other assets and properties specified or disclosed under serial number 3A of the original application without the prior approval of the Tribunal;

(v) you shall be liable to account for the sale proceeds realised by sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.

You are also directed to file the written statement with a copy thereof furnished to the applicant and to appear before Registrar on **06/03/2023** at **10:30A.M.** failing which the application shall be heard and decided in your absence.

Given under my hand and the seal of this Tribunal on this date:**01/02/2023**.

Signature of the Officer Authorised to issue summons.

Note :Strike out whichever is not applicable.

Registrar,  
Debt Recovery Tribunal

## OFFICE OF THE MERANGKONGTSÜR TELONGJEM TULI

Dist :- Mokokchung :: Nagaland  
Nükjildong :- "Telongjem Aser Teyaritep"

### TENÜNGSANG AGÜTSÜR

Merangkongtsür Telongjem Tuli Unit ajanga shirnokisa kaket shisatsü bushiba wadang nung jenjang tajung nguteta senso sanger nem konang nungsang bener arutsüogo parnok dang kanga dang pelaba lemsateber.

#### 1. Dr. Merangmenla

D/o. Lt. S. Lanumeren aser Mrs. N. Apokla na jala-i Doctorate of Philosophy, Chemistry Thesis 2 "Picidmic Acid based ID Copper (II) Coordination Polymer and its Polyaniline Composites towards Organic Transformations and Photocatalytic Degradation". National Institute of Technology Nagaland nungi ngutet.



#### 2. Dr. Bendangmenla T. Imsong

D/o. Mr. Tazungmeren aser Mrs. Nungshienla na jala-i Sectarianism in Matthew: A Socio Historical approach to the construction of identity in the Gospel of Matthew nung Doctorate of Theology in the department of New Testament, United Theological College, Bangalore under the Senate of Serampore University, India nungi ngutet.



Anungji, tarutsünung parnok taküm, wadang aser sempet ajanga lokti asoshi tajangzük aser temoatsü sü dakjang ta sarasadema atar.

Wt.Senlimongla  
President MTT

Wt.Toshimongla  
General Secretary MTT

## MEYIPA AGIR

Ni, Mrs Temsunaro Ajem-i 22nd February 2023 nü Hornbill TV news channel (<https://youtu.be/XkVadNoGtRY> at 7min 33 sec to 7min 38sec)

Youtube nung asür lmkongjeba Kichu merenshia tepseta aliba tasü mang angudang tejashi aser taoksa nung kechi o shiogo, iba ken o Chungtia Village Council-i ni 13th March 2023 nü ja-a ken o tembangba ama, iba o ni meyipa agiba metetdaksür.

## Netanyahu-i lenji maruba sülen Israel nung maneni longkak aiter

**Jerusalem, Metsüremi/March 16 (Agencies):** Obendangba bangdak tashi ajemdaksütsü asoshi far-right sorkari tasa yangluba anema Israel nungeri maneni longkak aita Tir Isaac Herzog nungi mepetmesü süngiemtsü sentong benokba Ato Kilonser Benjamin Netanyahu-i magizükba sülen maneni pa tsükshir.

Brehostibarnü Jerusalem nung longkak aiter temi linük indang Supreme Court leni aoba lenmang nung sentsü temerem teploktsü aser linük north tsütsü Haifa yimti tzükum nung rong tilaka makepa rong manendaksür.

Ajisüaka Netanyahu ya temolung temerangba akumer amai ajiteter aser Herzog sentong yagi tang aliba tensa tamajungba akumtsü ta ashir.

Netanyahu'er sorkari Israel indang court tem nung temelenshi balala bener arutsü merangba ajanga nüburtemi ola adok aser par tembar anüolen linüktema saksalemdaksü.

Mezüing benokba agizük asübo obendanger shimba tsütsü sorkar nem tashi tuluba agütsüla aser Supreme Court ajanga temzüing-ozüing agienba tashi ajemtsü liasü.

Atsütepba pangzüing tongtipangbaji obendanger tem shimba yimya melenshiba lir.

Justice Minister Yariv Levin-i ashiba agi, coalition ajanga benokba mera yagi Knesset ajanga obendanger tem shimba yimya melentsü aser parnok shimtsü atema committee nem sorkari tashi tali agütsütsü.

Herzog indang sentong nung selection committee nung

minister asem, high court indang tir, judges ana aser civil servants ana alitsü aser parnok shimba supreme court indang tir aser justice minister nati molungtsüla.

Bodhbarnü tiri Israel nung atsü-anem akatsü mapang tongogo aser tangatetep kati arutsü merangba nung shilem agia nisung meyerijang aika den hopta aika jemba arur, ta ashi.

"Civil war ka tenzüktüsü jenjang nung lir. Ni ajibo khenyongi memelatsü. Israel nung mepetmesü tulu adoka lir saka tejakdang maongka tulu lir," ta tiri ashi.

"Israel nunger timbai ochi obendang aser yimjung aliba sentong ka aginer," ta pai ashi.

Sorkar indang secretary Yossi Fuchs-i Twitter nung tir indang sentong coalition-i magizükero, ta ashi.

"Tir indang sentong ya tir tsütsü nungi lir aser coalition züingsem katia memolunger," ta Fuchs-i ashi.

Israel tir indang mapa ya timba sentong balala nung shilem agitsüba dang lir, aser coalition züingsemtem aser iba sentong anema nokdaker tsüingtai ia atsü-anem kateptsü pai jemba arur.

Netanyahu, shibai sorkar indang kongsang balala sako kumdaksütsü meranger ta ashir, par religious-nationalist coalition allies tem parliament nung züingsem timba lir.

Israel ato kilonser ya Berlin-i aotsü sentong yanglua aliba tatsüba kumogo, ta ashi. Pa Hokulbarnü ang meyipa shilangtsü liasü, saka sangdong tasen ka nung pa Brehostibarnü meyipa arutsü ashi.

## ICC Test Rankings: Ashwin maneni temaba jenjang nung lir



**New Delhi, Metsüremi/ March 16 (Agencies):** Bodhbarnü sayaba ICC Test Rankings nung bowler tem rongnung India nung Ashwin maneni temaba jenjang nung lir aser Virat Kohli-a century ka yangluba sülen jenjang tenet tejakdangi tua tang 13 buba nung lir.

Anogo 1,205 tashi century ka danga meyanglui aruba sülen Ahmedabad nung Australia den tatembangbuba Test asayaba mapang pai run 186 yanglua liasü.

India nung off spinner Ravichandran Ashwin, shiba taoba hopta temaba jenjang nung England pacer James

Anderson den külemi liasü, pa tangbo pa kija temaba jenjang nung lir. Australia den asayaba mapang wicket 25 agiba sülen pai iba jenjang ajanzüktetogo.

Kasa mapang nung Border-Gavaskar Trophy nung batting kanga junga amenba sülen Axar Patel-a jenjang ti tejakdangi tua tang 44buba nung lir aser all-rounders list nunga pa jenjang ka tejakdangi tua tang pezübuba nung lir. Iba asayamung nung pai asaya pezü nung run 264 yanglua liasü.

Australia nung asayartema iba asayamung tembangba sülen ranking nung temaba jenjangi tuogo. Opener Usman Khawaja Test batter

rankings nung jenjang ana tejakdangi tua tang tenetbuba nung lir. Iba asayamung nung pai run 333 yanglu. All-rounder Cameron Green batters list nung jenjang 11 tejakdangi tua tang 26buba nung lir. Test asaya pezübuba nung pai mezüngbuba century yanglua liasü.

Travis Head-ia iba asayamung nung kanga junga asayaogo aser Test batters nung pa maneni pongububa nung lir aser pai tang mezüngbuba rating points 853 ngutetogo.

Sri Lanka aser New Zealand na mezüngbuba Test asaya tembangba aser South Africa aser West Indies na asayamung tembangba sülen Test batters list nung temelenshi adokogo.

New Zealand captain Tim Southee-i Christchurch nung Sri Lanka den asayaba mapang wicket 7 agiba sülen Test bowler tem rongnung pa jenjang trok tejakdangi tua tang 12buba nung lir, kasa mapang Daryl Mitchell-a Test batter rankings nung tibubai tuogo. Sri Lanka den asayaba mapang pai innings ana nung run 102 aser 81 yanglua liasü.

## Kanjuruhan Stadium nung nisung ajemsetba mechi police ka tepuokdaki yok

**Surabaya, Metsüremi/ March 16 (Agencies):** Football asaya ka nung terepranger aziökba tsütsü mapa shidak meinyakba ajanga Brehostibarnü Indonesia nung court kati police ka tepuokdaki yok aser ana medentsü, koba alima nung stadium nung nisung ajemsetba lendong tamajungtiba rongnung ka liasü.

Malang, East Java nung 2022 küm October ita Arema FC aser Persebaya Surabaya tsüngta asaya rongrong tulu adoka tembang, kong terepranger nisung 135 asü, aser parnok ya aika police temi tear gas khaloktsüba ajanga tetokolen bushia nungtepding ajemseta liasü.

Taoba hopta Arema FC match ketdangsür ana mapa shidak meinyakba yong tepuokdaki yok, koba iba lendong dak sendakba nung obendang mezüngbuba liasü.

Police ka tenüng agi Hasdarmawan, küm ka ser tesadang tepuokdak ayutsü Brehostibarnü obendang

agütsü. Hasdarmawan yagi police dang tear gas khaloktsütsü totuyuba agütsü ta ketdangsür temi shia liasü, koba football alena yimsü asüba telok, FIFA-ibo nisung telok aziökba nung mamshitsü nokdanga lir.

Ano police ana - Bambang Sidik Achmadi aser Wahyu Setyo Pranoto - nem temeden agüja liasü.

Indonesia indang human rights commission ajanga bushisüngdangba mapang, police temi terepranger telok dak tear gas 45 khaloktsüba ajanga nisung ajemsetba lendong ya atalok, ta bushitet.

Stadium nung nisung tali liasü, ta bushisüngdangba temi ashi. Iba lendong atalokba sülen Indonesia indang top soccer league ajanga asayatem ita ishika atema shibanga liasü, saka timba asaya tenzükogo aser asaya karbo security mechi kishi shibanger asayar.

Indonesia nung May ita FIFA Under-20 World Cup asayatsü lir.

## Gianni Infantino tanaben FIFA tir inyaksü shimogo



**Kigali, Metsüremi/March 16 (Agencies):** Alima nung football tsütsü yimsüsüba tentet, FIFA indang congress nung tetokteper maliba sülen Gianni Infantino ya ano küm pezü tir inyaksü tanaben shimogo.

Arishi küm 52 tain Swiss-Italian lawyer Infantino iba menden asoshi shimba osang ya Rwanda yimtiba Kigali nung Brehostibarnü sentong ka nung metetdaksü.

2016 küm Joseph Blatter anentsüba sülen pa melena tanüngba kümsük asoshi Infantino ya shima liasü aser iba sülenbo tang ang pa shimer alitsü. Anungji 2027 küm ano pa 2031 tashi kümsük atema tokteptsü akok, ta FIFA temzüng agi ashir.

Candidate kata maruba sülen Infantino tanaben shimba ya yimya ka ama agia liasü, ajisüaka kuli balala mechi association züngsemtemi pa dak kangabo mesaklok. Pai World Cup ya küm ana nung khen

asayatsü sentong ka benokdang, saka tamakok ajurua liasü.

Germany, Norway aser Sweden densema European linük aikati pa tir inyakba nung mepelar aser pa meyaritsü shia lir.

73rd FIFA Congress nung voting system ajanga pa anema ola adoker mali ta jangjatsüba sülen Infantino shimba jangjatsü aser pai "Nenok ajak dang pelar," ta shia liasü.

"Shirnokisa ni meimer, nenok aika lir, aser ishikati ni sempar, ni nenok ajak meimer," ta pai ashi.

"FIFA tir inyaksü ya konang aser maongka tulu lir saka khureta tulu lir. Ni inyaksangshiba nung nai maneni tamang akatsü."

2026 küm North America nung tebur football World Cup asayadang team 32 aliba ya 48 akumtsü, aser tetsür World Cup nung team 32 alitsü, koba küm tatemlen Australia aser New Zealand nung asayatsü lir.

## Jordan, Uzbekistan tours atema India tsür football asayartem shimogo

**New Delhi, Metsüremi/ March 16 (Agencies):** Brehostibarnü India tsür football asayar indang head coach Thomas Dennerby-i ita tatemlen Jordan aser Uzbekistan nung international friendly matches asayatsü atema asayar 23 tenüng sangdongogo.

Senior women national team ya Jordan nung March 17 aser 22 tsüngta asayatsü aser Uzbekistan nung March 23 aser 29 tsüngta asayatsü.

AFC Women's Olympic Qualifiers indang mezüngbuba round nung shilem agitsü asoshi terenemshiba ama item matches ya asayatsü.

AFC Olympic qualifies nung India ya Group G nung lir aser parnoki iba asayamung ayonger Kyrgyz Republic aser Turkmenistan den April 4-10 tsüngta round-robin format nung asayatsü.

Iba qualifiers indang mezüng round nungi group winners tenet ya Asia nung five highest-ranked teams - DPR Korea, Japan, Australia, China aser Republic of Korea - den October ita round tanabuba asayatsü.

Jordan aser Uzbekistan nung friendly matches asayaba sülen ang Olympic qualifying tournament atema asayartem shimtsü.

Jordan aser Uzbekistan den

asayatsüpur itemi alitsü:

Goalkeepers: Sowmiya Narayanasamy, Shreya Hooda aser Elangbam Panthoi Chanu.

Defenders: Ashalata Devi Loitongbam, Sweety Devi Ngangbam, Ritu Rani, Ranjana Chanu Sorokhaibam, Michel Castanha, Dalima Chhibber, Manisa Panna aser Juli Kishan.

Midfielders: Shilky Devi Hemam, Anju Tamang, Indumathi Kathiresan, Sangita Basfore, Roja Devi Asem, Karthika Angamuthu aser Kashmina.

Forwards: Grace Dangmei, Renu, Karishma Shirvoikar, Sandhiya Ranganathan aser Apurna Narzary.



New Delhi nung 2023 IBA Women's World Boxing Championships nung Colombia tsür Martinez Maria Jose den 50kg-52kg (Flyweight) category Round of 32 match asayaba nung India tsür Sakshi Chaudhary-i takok nguogo ta sangdongba mapang tangokba noksa nung angur.

## BILEMDANGANG

"Nai jangraba temeden dangar nema agüjang."